

光緒睢甯縣志彙卷第十六

人物志 行誼 忠烈 政績 文學 隱逸 流寓 方伎

名賢不擇地而生豪傑每乘時而出故十室之邑必有忠信千載而下溯其芳徽雖人往風微猶可想其梗概焉睢邑近接鄒魯聖賢之教澤孔長界乎淮泗山川之靈淑斯萃其大節或見於史其懿行或著於鄉生其間者翹然異矣不有紀之何以示來茲而發其潛德歟作人物志

行誼

元

匡國政元帥才之子也仕元爲歸德府判官父死母孀居有疾

光緒睢甯縣志彙

卷十六 人物志

一

政割肝療治旣而復疾又剔腦和藥疾竟愈母年八十九卒廬墓三年有羣麕時至若素豢者人以爲孝感所致延祐二年有司上其事表其里曰貞孝

吳希曾父喪出殯天雨希曾以香爇腕禱天雨卽止遂殯人以爲孝德所感

明

沈彥禮趙翁周產民正統中歲大歉各納粟千石以賑饑民奉敕旌獎

王知止少習詩書長精騎射性慷慨剛直言動不苟庭訓子弟必以忠孝其仲兄早逝遺五歲孤撫若己出旣而孤又夭焉事

嫂如兄歿身不怠成嫂陳氏之節高作集有夫鬻妻者詰無他故貧不能存遂捐粟麥助之俾得完聚其制行類如此

李玉鉉幼穎慧詩書過目成誦爲諸生天性孝友父母生養死葬悉身任之不以問及其兄有妹幼孀而貧竝收養之以終其節居鄉排難解紛多所息睦地方有大利弊抗直敢言不憚詣公府力爭之

周宗輔性友愛自遠祖以來歷七世未析居及宗輔掌家務益置田廬戒子孫世守家法鄉人莫不服其義

孫清字廉夫邑歲貢生性至孝幼孤事母備竭其力明正德六年母卒時劉賊將至睢人知土城不可守倉皇奔竄清以母柩

光緒睢甯縣志彙

卷十六

人物志

二

在堂不忍去或勸之清曰與賊毀母柩甯殺我朝夕焚香告天生死與母柩共後三日賊至大肆剽掠清守柩號泣以情告賊首義之以一矢插其門禁勿擅入未幾賊去旋復至始終無一人入鄰里多匿其家賴以存活巡按御史江以聞於上詔命立石表其行旌爲孝子攝縣篆員外郎吳明美勒石書顛末並覆以亭期永久也康熙五十六年知縣劉如晏爲建孝子祠與王祥並祀

張滄母早喪父七旬滄事之極孝父或不食已亦廢食父與鄰翁田樊善輒邀與盡歡及父疾篤家有園圃盡質以資醫禱人或難之滄曰圃可再置父可再得耶其孝心滄篤有如此

彭繼泰天性孺愛十歲母卒齋三年事父守思力田奉養及卒合葬荆山結廬墓左嘗擔土築墳風雨卽號泣拜護屏妻子斷酒肉者又三年過其墓者咸指爲孝子廬

劉簡父染病垂亡簡百計療之不效乃割股以進父病遂愈有司嘉其孝給匾旌之

陳守母病思食肉守貧不能得割股肉奉母病遂愈有司以禮獎之

魏柱父坤疾篤思魚膾柱割股烹進父遂愈時大旱次日大雨鄉人以爲孝感所致知縣陳嘉略匾其門曰割股孝親而靈椿得茂婉容致養而萱室忘憂

光緒睢甯縣志彙

卷十六 人物志

三

馬宸邑庠生素孝友嘉靖年間隨父任年十三母病劇醫藥不效宸割股和藥病遂愈事聞巡按匾其門曰純孝根心

馬永貴宸之孫母鄭氏疾篤湯藥不效偶深夜思食肉貴素貧因割脇以代之疾遂愈有司匾其門曰雙孝

袁得水父病久不痊遂割股和藥疾愈有司嘉其孝請各院給賞粟帛

廖萬父疾篤忽思食肉家貧居村計無所出遂割股烹進父疾愈及母疾亦然知縣申其學立匾旌之曰教民孝又爲說以旌之

李躍龍父養梧病篤藥不效龍割左股一片調羹以進父愈知

縣康應奎旌其門

魏夢豸雲夢知縣夢蛟之弟也性喜爲善崇禎十四年歲大歉同里司村社逋欠百餘金苦於征比夢豸出已囊代輸欠戶得以無擾又捐建城池知縣高岐鳳給匾旌之

王天樞字清宇性奇特膽量過人素以驍勇著值明末寇起以功授游擊與興平伯高傑相爲犄角後因傑反棄職歸農適萑苻盜起練鄉兵以捍衛之

國朝

李枝芳字孟陽明季任廣東四會縣主簿勦賊有功升廣西桂林府經歷革代後家居不仕輕財好施順治十六年歲太歉出

光緒睢甯縣志彙

卷十六 人物志

四

粟麥千餘石賑救鄉里賴以存活者眾

李枝萼字華陽由恩貢生考授府通判以父母年高辭不仕性嗜詩書尤喜成就人才建鄉塾於宅之東名曰崇文書院積經史其中聘名師課生徒貧家子輒招致就學遇能文之士親疎恩怨不計也順治十六年歲大歉里人缺食捐粟二百石賑救之

李枝翹字條侯由拔貢生任官學教習考授知縣回籍候選性孝友父母竝登八十色養不衰有異母幼弟先人所遺田宅悉推讓之又割己產益之仗義輕財平生多大節名半海內所至賢士大夫雅重之詩文投贈之富彙輯成帙自著有商芝館集

燕臺三體詩諸刻邑於順治十六年升科額外荒田四千一百餘頃隨經水沈積逋歲增官民交累翹力白知縣石之玫請之大府會題下部議以考秩入都復叩部力陳勘實具題覆奉俞旨將額外水沈糧地永行除豁康熙十六年時河患方劇條陳河務十九事督河使者靳嘉納之册畱酌行地方大利大弊抗直敢言諸凡興革資建白之力居多康熙五十七年知縣劉如晏請從祀鄉賢

王佩字申玉例貢生賦性慈良砥躬嚴飭事親至孝教子有方好讀書不爲章句學所接交皆一時名士且慷慨樂施每逢凶年濟危扶困一切藥餌棺衣有求必應親戚鄰里賴以存活者

光緒睢甯縣志彙

卷十六 人物志

五

凡數十家

李杰歲貢生生三月而孤幼秉母訓綦嚴長益致力於學根柢深厚善詩古文辭康熙五十四年知縣劉如晏重修志書延爲秉筆性剛正樂善不倦曾創建節烈忠義等祠時邑有三教堂杰力請嚴革尤爲有功名教其辭曰爲稟請禁立三教堂特尊至聖以崇正學以光文治事竊維至聖孔子自漢唐以及元明典禮日益加隆然崇奉表章未有如我 皇上之極甚者也載在幸魯盛典超越千古竊思先聖先賢禁止民間私立祠廟近見三教堂立處均列至聖於佛老之旁像貌刻塑失真褻瀆聖靈莫此爲甚昔魏王肅以註道德經遂罷從祀韓愈以諫佛骨

得列先儒二氏之不得參列聖道此不待辨說而知者也杰讀聖賢書久存此見但草茅下士進言無由今值各憲崇尚正道屢檄修葺學宮捐補祭器縣臺遵奉舉行凡啟聖祠義學孝子忠義節烈諸祠正在興修要以體上憲彰明聖學之意如三教堂之褻瀆聖靈是宜詳請禁止者也故敢摠陳管見乞爲通詳各憲准賜檄行闔屬地方凡三教堂俱令撤去聖像改爲二氏堂在各憲推廣 皇上尊崇之意若聞三教堂之褻瀆未有不嚴加禁革者伏望詳請施行聖道幸甚旋經劉如晏據稟通詳凡三教堂未立者毋得再立已立者撤去聖像改爲二氏堂迄今猶嘖嘖人口云

鮑長盈年五十無子乾隆七年商於揚州入廁獲袱探視則白鏹也念必有人遺此坐待路旁食頃有人踉蹌覓袱詢之曰父被賊誣入獄變產營救問其數開袱視之悉符合舉以付之不告姓名而去逾年舉一子

王壽朋武庠生應中之孫性孝友行正直析居時讓產於兄弟扶困濟危族鄰倚之五水學士程萬程爲之讚曰閱世孔多維公無兩氣宇淵深襟懷霞爽詣重鵠原情輕鳧縵友于克敦福履終享偉哉高風至今欽仰子千健邑庠生坦易不分畛域輕財尚義傾囊倒困以救急難毫無德色長孫仙根恩貢生授教諭甲戌歲大歉累十載人皆廢學仙根激勵族里咸感憤從事

因材而就俾皆成器焉次孫庸武庠生出嗣胞伯存仁父千健疾庸侍立四十餘晝夜雖跛不懈及千健卒哀毀骨立營室墓側出入必奠告焉於嗣父母亦然邑人以孝推之事兄能敬每事必請命兄邁疾時延醫問藥外每虔禱神前歲歉施粟修橋補路尤膾炙人口曾孫儒英太學生事親孝樂善好施一如壽朋戚友貧困者周濟無吝色嘗以千金購宗祠爲節婦周氏建坊俱義舉也

王居常字燕卓讀書穎悟迫于遇納粟入國學事繼母以孝聞處世端方樂善好施鄉里有婚喪不給者輒解囊助之親鄰爭訟一經排解無不帖服遠近稱道常有越數百里而踵門乞請

光緒睢甯縣志彙

卷十六

人物志

七

者莫不如願以償里有夜獲盜而素識者盜曰刀鋸任汝爲但勿令王燕卓知耳其感人尤有王彥方蕭欒之遺風焉

王邦立太學生天性篤厚孝友克敦一生謙恭自持每遇公事慷慨任之不辭勞怨精醫術有求請者略無厭心常合良藥施予活人甚眾遐邇多感德焉

劉履和及弟履吉履坦履坤皆諸生父在時各析產父卒兄弟復同居相誠不聽婦言家務糧差及課訓子姪各有專司鄉里推爲義門

王述績太學生性慈愛篤孝友剛正嚴明終身兢兢自持凡背禮法者不敢少涉焉壽八十餘而終

劉曰瑋邑諸生幼孤事母孝雖列膠庠孺慕之誠依然孩提賦性卓犖每遇地方利弊卽挺身獨任知縣劉如晏額其門曰淮北英賢郭朝弼贈以詩曰當年不識此清真強把先生儼季倫等是人間一陳迹聚貲金谷是何人疾革時舉新故借券數千金盡焚之尤嘖嘖人口云

王藻字照萬邑庠生性極孝幼失怙能奉母教行止端方勵志詩書壯歲卽入泮宮且老成治家訓子成名以結高堂之懽接族鄰藹然可親略無疾言怒色

劉若桐歲貢生家貧事母以孝聞學邃品高澹泊自甘不以事務經心簞瓢屢空晏如也

光緒睢甯縣志彙

卷十六

人物志

八

劉日旭字扶昇增貢生賦性坦夷少時父曾授以千金觀其所志不數月而金盡問之則曰已濟貧乏矣晚年訓子弟以遠怨之道要學喫虧須體玩一學字學之久終身受用不盡也

劉揮字廣南歲貢生幼聰穎食餼後其祖命之持家檢得借券三千金命焚之祖歿後復檢得千餘金券亦焚之以成祖志晚年負重望鄉里有爭訟片言卽解以故終揮之世河北諸社少至縣廷者

王塾字景範家殷富仗義輕財樂行善事凡族眾親鄰有貧不能讀及婚葬者出資助之無吝色乾隆五十一年歲大歉民不聊生罄歷年所積之粟施舍賑粥數月粟告竭典衣易粟以給

之活人無算遠近無不感載焉學使知其爲人旌以樂善好施匾額子雅賢字肆霄庠生議敘鹽知事能繼父志捐修城工知縣旌以義效靈臺匾額繼又煮粥賑饑復旌以好善可風與庠生朱大誥等創立昭義書院捐地至數十頃存典生息爲山辰束脩諸生膏火人多稱道焉

劉淑楚拔貢生性倜儻勇於任事爲文精峭廉悍以弱齡補弟子員卽食餼上庠 貢成均選直隸州州判以母老家居不仕凡遇水旱饑饉年必先爲民請命可謂有功桑梓者矣

朱之承字紹衣號亦庵邑廩生善屬文事繼母佟氏至孝父卒時祖母在堂守節四十七年之承請旌建坊於里閭穎悟好學

光緒睢甯縣志彙

卷十六

人物志

九

蓄書數千卷或於他處搜羅散帙手自補輯篝燈夜讀目爲之昏弗顧也故詩古文詞駸駸乎人古人之室矣性剛直慷慨卒年五十一歲著有時藝四卷亦庵詩彙二卷管蠡集四卷子大醕字正軒幼秉庭訓儼如老成人事繼母夏以孝稱尤重文學延名師教弟大柱戒俗學期望甚重柱游於庠文名藉盛皆醕培養之力也性溫和而志趨高遠視世間富貴如敝屣也嘗慕郭林宗黃叔度之爲人教子孫以敦厚退遜戒涉輕浮尤有萬石君之風焉卒年五十三歲

朱之銑字澤有太學生生性孝友多才能詩年十三卽持家務擴充成巨富族中設義塾親友子弟賴以成名者數十人貧寒之

家賴以舉火者數十戶晚年德業益進年七十餘卒

卓從忠字贊化讀書未就延師教子鄉鄰有貧不能從師者悉令就學代籌束脩人多賴以成名尤恤孤寡荒年賑饑全活無算迄今人猶樂道之子廷芝字秀三亦有父風幼穎悟補弟子員爲人安靜與世無忤卒年八十五歲

卓從政字勝劇太學生性慈祥好施與素無瓜葛者向訴貧難卽解囊相助乾隆五十一年歲饑出粟五百斛爲糜全活甚眾戚族告貸皆遂其欲其族人某質田得價至三次者仍以償償之時以癡監生日之卒年八十五歲

王貫斗字含一太學生倡建昭義書院首捐千緡獨修駱家廟橋於宅東建關壯繆廟捐地八畝以柞義地梁姓三喪未葬出資助之麥舟之誼何多讓焉亦可風矣

王光斗字奎南歲貢生性孝友自少以樂善聞嘗以重價購一宅交房時售主涕泣不忍舍光斗廉得其實遂焚券宅歸原主而不追價咸豐三年歲大饑收養幼孩以百計庚申捻逆猖獗良民被擄逸回負圩以居者約五百餘人光斗量給川貲俾能鄉費錢三百緡不少吝闔邑節孝大半湮沒光斗延人采訪捐巨貲建一總坊於東關外使幽光闡發者六百餘人他若建書院修縣城補橋梁施饘粥俱踴躍捐輸克成義舉鄉人爲之歌曰王氏奎南多善舉生平無愧善人居知縣高丙謀以王善

人里旌之年九十餘無疾而終

王高斗太學生道光年間大侵施粥濟貧全活甚眾

王凌斗太學生性孝友義舉不可殫述仁讓之風至今猶嘖嘖人口

卓廷懋字德昭太學生前明戶部侍郎忠毅公敬裔也年十七以堂上春秋高躬持家務道光十二年歲饑出粟數千斛以贍族鄰焚積券一千五百餘金以甦鄉里又割鮑河膏田一百七十餘畝制錢五百千助書院膏火道光年間捐鉅款修本縣城垣大吏給匾獎之議敘八品銜大學士杜文正公以德式鄉邦四字表之平生最篤內行事衰父必博其歡侍疾衣不解帶者

光緒睢甯縣志彙

卷十六 人物志

十一

數月居喪哀毀骨立杖而後能起每祭掃雖垂老未嘗不流涕廢食與弟廷楫最友愛析產以膏腴讓之而自取其瘠遷居夾河灘相隔十餘里二三日必往視一姊適趙氏家貧分田宅給衣食使甥與子共讀又延名師課族人之無力從學者年八十無疾終子振五字信山議敘八品太學生兄弟不析產咸豐二年歲饑向淮南購糧二百餘石分給族戚鄰里繼以豆餅萬餘片給之存活甚眾大荒生亂議守望相助六年皖捻肆擾靈境戒嚴其團紳高樹功東向乞師慨然往援徐州道王勸捐首輸五千緡八年春賊擾睢境家遭兵燹賊退始築圩固守十年賊復擾睢境知縣黃憲鎧調練守城振五冒雪往助十一年苗逆

肆掠東方與靈璧圩董高恩淑力持苗逆由是忌之九月遣黨夜襲高家圩長驅大進兩圩密邇勢甚急振五協同官軍嚴防卒無恙同治元年沐陽劉履謙幼孫被匪擄以二百金代贖之亦不索償光緒三年歲旱輸牛捐三百緡晉豫賑亦輸二百兩本邑安懷堂皆努力輸將晚年家稍落然戚友負欠者至巨萬皆不索償生平行誼多類此年八十卒噫如振五可謂能繼父志矣

劉淑澄字晏波太學生凡事濟人之急道光三年歲奇荒城中義倉粟不發謁見知縣請發米豆千餘斛分給貧戶比秋歸倉時有逃亡者有托累者探已囊如數償之一生仗義輕財類如

光緒睢甯縣志彙

卷十六 人物志

十一

此

李英烜太學生殉難訓導之實六世孫也立品端方好義睦族睢宿虹泗皆目爲善人

李仁瑞邑庠生事親孝處兄弟友愛析居時悉以美田宅讓之創立昭義書院親鄰有急無不力助之九十二歲無疾終

周元球字霞鳴由監生考授州同知爲人天性孝友樂善好施凡族中有貧不能讀及嫁娶無力者皆酌以財帛助之晚年倡修義學捐資數百金知縣給匾旌之

陳垂統字繼業太學生少孤事母孝教弟姪各因其材悉成就乾隆年間大饑族眾賴以生活

王者香字畦蘭號芳谷年二十四入庠於乾隆癸卯援例入國子監學丙午入都捐職主簿以父年高不仕天性孝友事親以孝聞建宗祠續族譜理祭田祖塋碑銘皆經營盡善嚴督子弟耕讀三子六子相繼入庠克紹書香乾隆丙午歲大禋道里流亡者眾每晨煮粥二甑酌給老幼強弱以仲冬始至次年季春止十餘年無少間斷年七十八卒於家

王士奇家貧以木工爲業在凌城集拾遺票十二千守其人還之不受謝九十五歲卒

王希賢字聖階武庠生精醫爲人療病不索謝有貧不能購藥者出資助之嘉慶年間郡守田延爲子視疾時諸醫束手希賢

光緒睢甯縣志彙

卷十六

人物志

十三

用藥悉效田德之贈以金卻不受適府試希賢次子與試田欲拔冠軍希賢以爲不可辭之田旌以匾額

丁士修副貢生性方直人皆畏敬老而好學九十六歲卒

陳履中字鑑光邑庠生創設宗祠上奉先祖下裕後昆鄉鄰爭競秉公排解使兩造嫌疑盡釋遠近推服教子弟成名抱孫親見入泮詩書世澤鄉里榮之九十三歲卒

陳奎光字占元邑庠生好讀書有貧不能讀者不責脩脯資其衣食教誨成名人多感服公製鄉里儀型以表之家貧好善修城橋諸工不遺餘力士林引重焉

朱景和字春皋號飲萬貢生性和平嘉道間倡修學宮建魁樓

魏雲倬字象衢歲貢生博學能文而重名義尙氣節尤有大過人者道光初年同學某受侮蠹役雲倬挺身獨任疊控大府事卒白知縣劉議創書院邑董王肆宵等咸以爲非雲倬莫能爲之倡冒雪登堂婉商逾日雲倬始並轡而來首捐百金爲多士先多士亦踴躍輸將事賴以濟

梁汝吉字爻六增廣生家世詩書早歲卽以文名雖弱不勝衣而風骨稜稜有英發氣邑人王肆宵等創書院時邀與共事能任勞怨終事後徒步而歸授讀里塾獲其益者甚眾

劉保慶武庠生少孤事瞽母以孝聞嘗至高作集典舖適典失朱提百餘金主者疑舖夥私竊逼迫之夥窘欲死翌日慶又至光緒睢甯縣志彙

卷十六

人物志

十四

夥叩之慶曰銀我用緣匆促未告爾如數與之年終糞除地板下朱提在焉夥感泣元旦持銀叩謝笑遣之

秦作模附貢生道光十二年重建昭義書院捐資至三千一百五十兩模子景淞道光十七年捐修縣城模孫需倡修龍溝石橋咸豐八年皖匪竄擾需率練緝獲巨匪尤有功於鄉里

邱峒邱鈺邱澤清邱澤霖皆篤行好義澤霖尤有隱德自稱逸遺又有呂輝金鏞皆諸生朱地候選縣丞其行誼與邱氏昆季等至今人尤樂道之

邱澤存邑廩生性剛果鄰有鬪毆一言立解家居有仁讓風以產讓弟讀書衣不解帶蝨褲漉漉家人取其襪搗之一色盡赤

其勤苦自勵如此

邱澤鵬字程萬增生性孝友能養志親歿每祭祀悽然動容兄亦諸生性剛直鵬承以謙遜且以已產讓之

周鶴年字羽裳捐職衛守備賦性曠達每以遠大自期時知縣劉議改建書院先捐數千金襄成盛舉鶴年家僅小康而獨能踴躍輸捐可謂難矣

周椿圃號春浦捐職衛守備賦性慷慨樂善好施鄉里婚葬事有限於力者罔不周濟生平以豪俠自期豁達踔躡時露鋒芒令人畏敬凡人不敢爲者必挺身任之排難解紛扶危濟困隱然爲一鄉之保障觀察嚴郡守周均給匾獎之

光緒睢甯縣志彙

卷十六

人物志

十五

朱承墉字繼先太學生性嚴正有心計初年家不甚豐經營締造積累至巨萬好義有識力爲一方保障成族譜敦親睦族好行其德鄉人翕然稱之

朱騰驤字可石原名大柱邑諸生名璪之父事繼母夏以孝聞夏歿哀毀骨立事兄更篤兄病中風往父塋泣禱至嘔血兄病亦間好學熟於經史及漢魏六朝唐宋之文朝夕研究下筆千言立就藏書數千卷手植花木春秋佳日香浮滿院與二三同志畱連唱和縱談古今燈花頻落其興不衰尤好排難解紛晚年獎掖後進不遺餘力居恆手不釋卷遇書肆有異本必購而切究之嘗勉子弟曰讀書爲名儒居家爲孝子出仕爲忠臣皆

不可易也卒年五十六歲以子名瑛

誥封中憲大夫

府志封典未載

王雅韻字琴山善士也精醫術貧者資以藥餌全活頗眾又嘗獨力建橋鄉里之窮乏亦時濟以財穀歿之日遠邇哀之

王祥泰性慷慨自置黃河灘地百餘畝捐入昭義書院

王鳳翔字輝千歲貢生與弟仞千議築高作圩不辭勞苦雖千戈擾攘然手不釋卷居圩三年足不履城市兄弟皆友愛好學王義源庠生性方剛董書院事闔學敬服兄弟五人友愛逾恆父母病侍湯藥衣不解帶數十日親歿不食五日積勞成疾數年卒

王義矩字品三慷慨好施歲歉鄰人鬻妻代贖之並周以財穀

光緒睢甯縣志彙

卷十六

人物志

十六

施地十畝以作義冢子

有父風親鄰貸數百金悉焚其券

王方維字運斗幼勤讀善詩賦作文幽拗耐人尋繹然困於場屋未博一衿事父母以孝聞教子弟極嚴與世無忤排難解紛至老不倦學伎黃體芳給匾旌之曰錫類垂型

劉翼垣字維所拔貢生好讀書爲文清空俊拔書法亦逼近南宮數奇不遇以拔貢終嘉慶甲子科制府鐵保招之入幕以親老辭終身不履公廷教授生徒指畫不倦尤好接引寒士成就者不下數十人

武如璞字琢菴邑諸生以孝聞父雲章九十四歲卒璞壽亦至九十九歲五世同堂人以爲積德所致

袁錫柜字瑞亭太學生性孝友父病侍湯藥衣不解帶親滌廁穢歷五年如一日居喪哀毀骨立見者垂涕事兄尤謹弟弱而多病曲意扶持若疾痛在身家故豐好施與嘉慶十八年河決王家塘水高丈餘僱船沿流拯救賴不死者數百人道光十三年邑大歉鄉鄰踵門以田輕值書券求售慨然曰利人之危吾不忍也因出資與之反其券遠來乞食者復酌給錢文全活甚眾遠近稱爲善人其他若建河橋創育嬰堂修文廟櫺星門捐修城工諸義行不可枚舉晚年以栽培後進爲心創建昭義書院尤不辭勞怨董書院事二十餘年闔學無間言學使以敦倫尚義旌其廬里閭榮之咸以爲無愧云

朱疆字雲程增廣生有田百畝去其半以殯父母謂諸子曰是皆爾祖所遺爾等果能自立祖遺雖少亦足生活諸子皆諾輩庠序者二人並以醫顯孫大松早卒婦劉氏身殉見列女傳朱大奎字星垣布政使理問有幹才遇事揮霍縱橫包掃一切性節儉而好義勤於稼穡設義塾延名師四方來學賴以成名者數十人富於財而不吝於施人皆感之

朱大占太學生性方嚴而有渾厚風治家有法不以利自私咸豐二年大饑使戚族無凍餒至今子孫繁盛人以爲積德之報云

朱大義邑庠生孝友兄弟五人族中子弟貧不能讀延師課之

喪葬有助人皆心感年四十父有疾憂勞嘔血卒

卓振九字經田候選從九品性孝友居親喪哀毀過禮水漿不入口者數日遇祭掃必哭泣雖老如孺子有姊氏貧厚卹之分田宅以給諸甥延師課讀俾之成立修族譜助戚黨教子弟以孝弟尤敬禮儒士

卓振六字藝三從九品銜性敦厚咸豐二年歲大饑十年皖匪東擾同治五年秋大水戚族鄰里皆賴以生活光緒四年晉豫奇荒輸貲助賑復煮粥以食流民遣散時量給川資戚屬吳姓貧甚有二世喪停不能葬力任之姊妹困窮者餽遺無虛日其急人之急類如此

光緒睢甯縣志彙

卷十六

人物志

十八

卓振甲字撫軍捐職千總事親孝鄉里有善人之目

卓振第字華章太學生好施與尤喜獎掖後進成就頗眾精岐黃爲人療治不索謝一時有樂善不倦之稱

李兆白字愛青嚴正有膽略時邑人李三鬧李攀桂作亂不爲附己者禍兆白不與之通人皆危之後亂平良民往依獲免者甚眾咸豐八年春皖匪至率丁壯擊卻之五月匪又至復擊卻之後屢遇賊皆得免卒年八十三歲

劉荃坡字化坪邑諸生性孝友父歿時大父猶存養志承歡閱九年如一日課季弟蓮坡學有成名冠一時拔萃後猶訓誡周詳無少懈平居教子弟以踐履篤實爲先至睦族恤鄰尤多古

誼咸豐三年歲奇荒炊烟幾不自給而告急者來仍力圖分潤亦善士也其仲子喆坐精古學著有韻法淵源以宮音居首能正前人之誤

劉邦慶字軼凡武舉父景向太學生賦性剛直鄉里豔稱之邦慶能繼父志樂善好施建書院捐貲千金捐地頃餘至修魁樓城垣皆慷慨捐輸咸豐九年捻匪蹂躪獨力築圩保護一方十一年皖匪困圩數千家烟火不舉破產援救無吝色生平敦親睦鄰敬教勸學尤有卓卓可傳者

邱明暢邑庠生曉大義創建支祠與弟共成其事族中子弟延師課之成就頗多

光緒睢甯縣志彙

卷十六

人物志

十九

邱光衢字荷天千總銜爲人慷慨嘗獨力建橋遇貧寒推解無吝色捐助書院六百緡以襄善舉咸豐年間創修圩圍鄉鄰賴以保全

呂廣志性至孝幼失恃事繼母朱以孝稱妹孀居育母女以全其節睦宗族創祭田解衣推食排難解紛不可枚舉親見五世同堂其妻胡氏皆九十餘歲卒

金銘文字煥章太學生天性孝友濟難扶危道光二十三年修學宮勸捐集貲殫力經營禮門義路本在櫺星門內泮水在照壁外銘文請之於學將照壁移近城垣東西建橋以通文渠三年功竣始終無怠又捐資建城西白塘龍河通水橋咸豐年間

集練守城知縣甚倚賴之

陳孟道武生幼失怙事母以孝聞冬日母病忽思食杏日夜號泣尋覓忽於僻巷中見老杏一株結實二枚摘以供母病良已人以爲孝思所致

孫廣元字茂林工醫孝子清之後也不慕榮利居恆以課讀爲事弟子多成名者而勤於講學取與不苟人咸重之

朱士奇性抗直見義勇爲歲饑賑貧活人無數八十二歲卒

李雲境讓祖產於弟以館爲家子兆桂亦有父風以產讓弟自耕硯田以經教子其行誼可勵薄俗

李宗禮心性渾厚父歿哀毀過甚事寡嫂致敬委曲求全捻逆

光緒睢甯縣志彙

卷十六

人物志

二十

竄擾創築土圩以衛鄉里全活甚眾八十一歲卒

任德立字太軒諸生性端謹咸豐八年皖匪至德立居父喪守柩不忍去賊入門德立罵曰若輩身受國家覆載恩作賊行兇大兵至亡無日矣賊笑其迂擊之不死竟舍之去

葛覃字芸圃增廣生幼孤兄弟六人事母至孝撫諸弟悉以產讓之

吳新民字紹典 恩賜翰林院檢討幼而好學至老不倦品行端方人所推重洵爲一鄉之望咸豐二年卒

郭向榮字木齊恩貢生父雲峯舉人父子皆設教於外父時年高向榮每日往省父或有不悅色必效老萊子嬉戲於膝前務

得心歡而後已父年七十餘而子亦屆花甲藹然孺慕人皆服其孝而敬其義焉

郭樹棟字幹臣歲貢生家貧以禮自守不預外事勤於教讀尤體恤寒士往往助以膏火多所成就

龔雅南字夢周增廣生事親能曲意承志族黨以孝稱癖嗜詩書手不釋卷寒暑不輟家貧常不給而祭祀必豐鄰里有爭訟輒往勸諭至再至三必解而後已其教學循循善誘無厲色亦無倦容負郭而居春秋兩丁外未嘗一履城市

魏愛嵐事父孝不遠遊父病革禱於神願以身代次日疾果瘳後數年復疾藥需青魚聞邳州產此渡黃河風惡舟人不敢解

光緒睢甯縣志彙

卷十六

人物志

二十一

纜嵐自操舟竟渡無恙父歿廬墓三年七十八歲無疾終

白雲峯邑庠生性忠厚不預外事教讀精勤人化其德知縣高命宣講 聖諭殷殷善誘風俗爲之一變

何景士家貧苦讀年十三游泮有薄田三畝悉售刻陰隲文以勸世平日戒殺放生忽隻身外出不知所之

袁龍驤字儀賓候選布政司理問賦性慷慨樂善好施凡附近甕道河梁巖廓古寺皆獨力建修施寒衣設粥廠一切善舉無不爲之創修圍圩計費千緡其弟竟成素著驍勇帶隊禦賊其子夢錦亦隨同防守咸豐二年知縣高給匾額曰西方保障八年 欽差袁給匾額曰捍患鄉區蓋以生當晚近獨能仗義保

全鄉里故至今三十餘年父老猶稱道不置云

邱毓驤太學生工書不名一體求書者接踵而至出筆從容大雅掃盡俗氛蓋其天性然也西匪東竄帶練助剿屢有捷音咸稱爲東南保障

賈漢卿字輔臣處世和易咸豐八年倡辦團練輸貲助饟鄉里賴之

夏銘鼎武舉性慷慨嘗獨力建了元觀咸同間歲歉出穀賑恤族黨賴以生活者甚眾施藥濟病數十年如一日無疾卒於家朱迎浦太學生咸豐三年饑設廠施粥六年春又大饑復設廠施粥活人無算

光緒睢甯縣志彙

卷十六 人物志

二十二

呂廣成性慷慨咸豐四年攜粟六十石往五河出售見餓莩盡散其粟以與之年近六旬乏嗣連舉三子其時皖匪竄擾移居黃家圩賊攻圩垂破矣廣成以良馬往說其魁劉天福圍遂解活人無算

胡清安賣水爲生事母至孝每日得貲必購甘旨奉母

李鉅業字鶴峯業儒醫精疹痘科救活四方嬰兒無算父母早逝立主事之每食必祭終身不倦嘗自傷曰余之報親者止此耳豈不痛哉事孀嫂恪恭不懈年逾七旬逢朔旦必具衣冠肅拜禮畢始告退焉教幼弟嚴義交至俾早年聲噪鬻宮生平嘉言懿行尤難以枚舉

劉奇峯字峻嶺性肫厚弱冠肄武值歲荒絕意功名咸豐八年遭皖匪之亂人不聊生倡率鄰眾築石砦於花山之巔周圍四百餘丈高八尺踰月而工竣數千家托命於茲卒獲保全越兩歲積勞成病年六十有九卒其一生睦鄉鄰恤鰥寡排難息爭人多稱道不置

陳士齊字克家秉性剛直心口如一髮逆滋擾時管理圩務尤自勤勞每聞賊警內外嚴備嘗六日夜目不交睫鄉鄰共送赤心捍衛匾額年八十四歲卒

李鴻才字鳳樓恩貢生生平嗜詩書篤孝友同胞五人析居時凡先人遺業悉讓於昆仲貧乏者時資助之有妹適杲夫蚤亡

光緒睢甯縣志彙

卷十六 人物志

二十三

家貧孤甥尚在襁褓迎養於家衣食供之甫長卽教之讀成立後始送歸焉

呂涵萬性仁厚咸豐三年歲饑鄰里皆有菜色罄已所有之粟十五石餘併賣地獲錢五十餘千買豆餅雜糧分散鄰里因以活生甚眾又於同治五年捐錢設立義學使鄰里秀靈者入學愚魯者親與之講明孝友風俗爲之一振年九十三歲卒鄰里無不哭弔至於排難解紛不可勝舉

張懷良咸豐三年歲歉族鄰多不舉火懷良不忍計家中雜糧邀族長張瑾按人口分給不足又賣田獲價三十餘千買糧分濟族鄰同治六年間到顧鳴梧家有外省李汝生爲饑賣妻妻

不肯去相對泣良憐之解囊相助夫婦得以保全麥熟李回家來門叩謝又助以旅費年八十四卒

蔡兆化字澍三太學生天性純篤事親以孝聞生平仗義輕財樂善好施意豁如也咸豐三年歲奇荒煮食以賑饑餓遠近賴以存活者甚多其家貧無資葬者棺木殯殮之年老無供養者衣食推解之至於孤寒後進俾之讀書者尤不可勝數排難解紛有古君子風焉

邱培之太學生樂善好施言動不苟咸豐癸丑丙辰歲奇荒施衣設粥全活甚眾捻匪竄擾創修圩砦爲鄉里捍衛徐州道王捐辦軍需輸錢百緡本邑修理縣城亦捐錢百千知縣黃憲鎧

光緒睢甯縣志彙

卷十六 人物志

二十四

額其門曰樂善不倦

高雲珠字貫之邑庠生性豪爽慷慨好義饑歲多所全活排難解紛片言立定又立眾善強恕二堂以濟窮歿後邑人士猶慨慕之

王秉樞邑諸生早歲以文章名家於睢靈之交湖河交匯盜匪滋擾未獲卒業道光末年盜風日熾聯絡鄉團互相接應屹然爲一方之保障者十有餘年而排難解紛片言立定尤爲鄰里所欽服云

周上元字建昌天性純篤事親以孝聞生平仗義輸財毫無吝色其持已端方與人公恕鄉里爭攘羣相服於片言一時望重

鄉評有彥方復生之譽

周特字伯起拔貢生幼英異善讀書髫年補弟子員試輒冠軍  
食餼上庠屢戰棘闈不第旋以康熙戊寅科拔貢考授知縣親  
老辭不赴仕居於城市絕趾公庭而閉戶誦讀於羲經尤加意  
揣摩自著周易詳解未梓生平好仗義輸財每以濟人利物爲  
念睢邑大小兩河地廢糧懸官民交累恭逢

聖祖南巡與本邑張騰蛟劉日璋等公疏叩豁於三十年蒙除卽  
今兩河廢地萬姓蒙休者也嗣後每逢地方大利大弊事卽挺身  
獨任雖費重貲略無難色劉如晏知睢時重修邑城將請帑  
特聞之慨然曰城者衛社稷護民生雖朝廷事詎非吾黨責哉

光緒睢甯縣志彙

卷十六

人物志

一二十五

遂官捐五百金以爲闔邑倡一時修建覺宮書院壇社邑志諸  
大義舉皆慷慨捐助始終不倦其他敦本睦族賑貧卹乏事尤  
不容枚舉

邱毓魁太學生與堂兄弟毓庭毓興毓標等同居眾至六十餘  
口五世未析嘉慶十八年歲大饑斗米千錢周濟族鄰兩月有  
餘二十三年村有火災延燒房屋四百餘間毓魁量爲修整遐  
邇咸稱知府顏額其門曰五世同堂

忠烈

元

匡才漢丞相衡之裔也雄勇多智好讀孫吳家言仕金爲武略

將軍金亡率所部歸元尋拔五城授沂邳東河監軍丙午邳人  
袁萬作亂破之加沂邳東河監戰兵馬使戊戌徐守張名叛復  
破之進沂邳東河元帥兼建武軍節度副使壬午宋兵大入境  
戰不利死之延祐二年敕賜褒德碑以旌其忠

詳載古蹟

全文瑞仕元官至兵部尚書至正末奉命視師總制天下兵馬  
鎮守潼關與明兵戰有功元亡隱居睢邑不仕太祖特詔起用  
守義不屈及召徵再三知勢不容辭乃服醜卒

考元史並無其人姑據全氏族譜載入

明

朱用之明成化甲午科舉人朱迪之子元進士永祚曾孫也幼

光緒睢甯縣志彙

卷十六

人物志

二十六

負勇略以氣節自尙劉寇將至居民多奔散用之語人曰如皆  
逃去縣主誰與守遂倡其願畱者爲拒守計賊至攻陷睢城用  
之率眾血戰救護知縣蘇宵及其眷屬出城回奮勇復戰賊怯  
佯退歸營用之力疲歇息於城內樓上賊畱細作探知用之所  
在擁眾圍樓以攻用之墜樓傷足被執賊奇其勇欲降之用之  
罵賊不屈遂見殺巡按御史江以聞於朝稱其精忠貫日義勇  
超羣旌爲義士命建祠祀之祠舊建於縣治大門內隆慶二年  
圯於水萬厯初知縣申其學祀於養正社而以同與難之主簿  
邱紳金聲典史袁浩附焉尋復久廢康熙五十六年知縣劉如  
晏爲專建義士祠附祀明義士邳州太學生王台輔

周遇吉錦州衛人

按周氏家譜睢甯風虎山人原名時純後改名

少有勇力好射生

後入行伍戰輒先登積功至京營游擊京營將多勛戚中官子弟見遇吉質魯意輕之遇吉曰公等皆紈袴子豈足當大敵何不時練膽勇爲異日用而徒糜廩祿爲同輩咸目笑之崇禎九年都城被兵從尙書張鳳翼數血戰有功進前鋒營副將明年冬從孫應元等討賊河南戰光山固始皆大捷又明年復出討賊破胡可受於浙川降其全部楊嗣昌出師襄陽遇吉從中官劉元斌往會張獻忠將至房縣嗣昌遣遇吉扼守槐樹關賊不敢犯十二月獻忠敗於興安將走竹山竹溪遇吉復以嗣昌令至化石街草店扼其要害賊自是盡入蜀遇吉乃從元斌駐荆

光緒睢甯縣志彙

卷十六

人物志

二十七

門專護獻陵明年與孫應元等大破羅汝才於豐邑坪又明年與黃得功追破賊鳳陽已而旋師敗他賊李青山於壽張追至東平殲滅幾盡青山遂降屢加少保左都督十五年冬山西總兵官許定國有罪論死以遇吉代之至則汰老弱繕甲仗練勇敢一軍特精明年十二月李自成陷全陝將犯山西遇吉以沿河千餘里賊可渡處分兵扼其上流下流蒲坂屬之巡撫蔡懋德而請師於朝廷遣副將熊通以二千人來赴十七年正月遇吉令通防河會平陽守將陳尙智已遣使於賊諷通還鎮說降遇吉遇吉叱之曰吾受國厚恩甯從爾叛逆且爾統兵二千不能殺賊反作說客耶立斬之傳首京師至二月七日太原陷懋

德死之賊遂陷忻州圍代州遇吉先在代遏其北犯乃憑城固守而潛出兵奮擊連戰數日殺賊無算會食盡援絕退保甯武賊亦踵至大呼五日不降者屠其城遇吉四面發大礮殺賊萬人火藥且盡外圍轉急或請甘言給之遇吉怒曰若輩何怯耶今能勝一軍皆忠義節不支縛我予賊於是設伏城內出弱卒誘賊入城急下閘殺數千人賊用礮攻城圯而復完者再傷其四驍將自成懼欲退其將曰我眾百倍於彼但用十攻一更番進蔑不勝矣自成從之前隊死後隊繼官軍力盡城遂陷遇吉巷戰馬蹶徒步跳蕩手格殺數十人身被矢如蝟集竟爲賊執大罵不屈賊懸之高竿叢射殺之復齶其肉城中士民感遇吉

光緒睢甯縣志彙

卷十六

人物志

二十八

忠義巷戰殺賊不可勝計其舍中兒先從遇吉出鬪死亡略盡夫人劉氏素勇健率婦女數十人據山巔公廨登屋而射每一矢斃一賊賊不敢逼縱火焚之闔家盡死賊每語人曰他鎮復有一周總兵吾安得至此福王時贈太保諡忠武列精忠祠

明史

本傳

按康熙田碑述公本係徐州府睢甯縣風虎山人萬曆末以失遼左以應寡入錦州衛籍其周氏所藏舊譜敘公事與史略同交見古蹟

王台輔邳州諸生住睢地聞宦官復出鎮將草書極諫會李自成陷都城痛哭南還福王立東平伯劉澤清御史王燮張樂大宴於睢甯台輔縲絰直入責曰國破家亡公等卧薪嘗膽時也

乃飲酒大會耶及南京覆台輔泣視其廩曰此吾所樹盡此死耳次年粟盡集里黨衣巾出見大呼烈皇帝北面再拜自縊

舊志

失采特  
爲補入

國朝

呂爾占庠生應瑞子也瑞少失怙繼母撫之成立娶周氏生占甫十歲而周亡瑞誓不再娶訓子占必以義方占由歲貢薦授蒙城訓導未及赴任順治十年九月膠寇突至火其西門城破占奮呼奪其刀殺賊賊怒眾刺殺之身中數槍罵不絕口死時同與難者廩生魏夢熊生員金慶雲王所重侯贊化傅貞默魏振吉李明台湯孕奇朱鉉胡恭人胡元調王遇賢全組張紀胡光緒睢甯縣志彙

卷十六

人物志

二十九

維綱全匏等共十六人

全翹庠生存奇之子也幼業儒性醇樸不事華靡膠寇破城眾各驚逃翹祖母邱氏年八十餘翹與妻張氏扶掖而行賊突至將殺邱翹夫妻跪泣環抱以身捍刃賊怒殺邱並及翹張氏亦投井死

王世雄字英度順治十年膠寇犯睢世雄率眾往禦鋒勇莫當

遇害

舊志失采  
特爲補入

卓采官睢南營守備勤於職乾隆五十四年周家樓漫口采率兵役上埽護救夜半狂風雨大溜衝埧采落水救之不獲奉

旨照陣亡例議恤

續行水  
金鑑

王家幹有智勇膽略由武舉投効揚州軍營以戰功擢千總咸豐五年署六合千總練士卒繕守備井井有法時金陵逆黨於對江九洲築壘官軍屢攻不克署六合縣溫紹源商派家幹同都司秦懷揚往攻乘大霧而入取賊礮轟之賊不意官軍猝至遂潰克其壘以功擢都司仍守六合家幹與溫紹源同心議死守益募敢死士大小百戰屢摧強寇歷四年之久軍無懈志士無生還之心八年九月賊以全力攻之家幹激勵士卒奮擊城垂破屢矣繕血書乞授於勝大臣不應提督張國梁率師來援阻於重圍不得進十八日寅時賊穴地道轟城而入溫紹源全家殉難家幹猶持刀巷戰力竭陣亡奉 旨優恤贈雲騎尉

光緒睢甯縣志彙

卷十六

人物志

三十

世職六合人至今祀之

陳慶五品銜浦口外委隨同王家幹守禦六合晝夜督戰日不交睫十餘日城陷力戰死之

胡成忠率練勇至宿州與賊接戰殺賊多人力竭陣亡郭孝先遇賊不屈被害馬生軼其名爲賊所掠以理斥之被殺此皆咸豐八年事也

張榮芳廩生咸豐八年捻逆至率練往勦戰死知縣詳請入祠  
李芳彪武生咸豐八年捻逆至率眾擊賊父子俱被害知縣詳請入祠

劉錦堂字雲裳帶練禦賊陣亡知縣詳請得恤入忠義祠

王立功字樹勳善騎射勇力過人咸豐八年五月二十二日西  
匪至湯家集立功張弓矢率練勇拒戰傷賊馬一眾寡不敵被  
擒徧體無完膚死甚烈

陳象賢諸生咸豐八年皖匪東竄其父震乙率練擊賊象賢以  
父老代之賊至眾寡不敵力竭陣亡

覃繼榮素有膽勇咸豐八年隨練董張榮芳禦匪於張家大路  
殺賊數人力屈而死

陳以和邑諸生咸豐八年九月十三日匪突至鄰里奔散以和  
獨擁書坐匪入其室猶以大義責之遂遇害

陳秀濱陳秀升陣元輔陳步高俱於咸豐八年九月十三日拒

光緒睢甯縣志彙

卷十六

人物志

三十一

匪被殺

龔肇連龔肇鸞龔維清皆咸豐八年禦賊被害

朱之紱性慷慨有肝膽善騎射咸豐四年春捻逆李三闌等蹂  
躪睢泗靈璧之間大肆剽掠官兵巡緝既緊匿宿遷潘家山陰  
謀復叛之紱隱購三闌心腹使爲內應密白知縣高丙謀自率  
練勇數百人乘夜圍山攻其不備擒三闌等解大府正法羽翼  
悉散闔邑賴以全泊八年秋西匪東下之紱與胞姪大蘊嫂王  
氏同時死於難其子璜亦被擄去說者謂三闌羽黨借以復仇  
云

姚鳴玉字佩珩性剛直咸豐八年捻逆至率練奮擊死之

王德立童生馬山寨人築寨山巔無水賊至困之率眾力禦渴甚眾遂潰死之

沙遂元諸生在宿邑埠子集課徒捻至率練禦之敗死於集外入忠義祠

高輔清儒童小試屢列前茅匪至不屈死

來喜軼其姓厲步堂僕也咸豐八年步堂拒賊於潼山戰敗來喜負之逃賊追及步堂囑喜先行喜號泣不去賊擊之喜以身翼之相抱而死後步堂子尋其屍喜尤手抱步堂一手作禦賊狀眾擘不能開焚楮祝之始分葬焉

朱元賊執喂馬叱曰我卓千總親兵賊奴何敢賊怒殺之同時

光緒睢甯縣志彙

卷十六

人物志

三十二

被害者有朱允平卓學恆二人

曹芑澧咸豐八年皖匪至不屈死

朱清泰儒童咸豐八年率練擊賊戰敗念母老病急歸家不能遠逃清泰依母不去賊欲殺其母以身翼之遂被害其母獲全其時又有任秀荃亦業儒率鄉人守莊眾潰賊將以刃刺其父母秀荃卽與賊鬪力竭被害父母獲全

高學平字坦途有勇力咸豐八年九月十四日率眾禦賊中槍死同日又有朱名儒亦持槍殺賊被害周振宗周振清高作集人亦率眾禦賊戰死

武忠伯儒童幼穎異讀書數行並下咸豐八年九月十三日西

匪東竄宗伯率鄉人禦之眾寡不敵身被數槍死同難者武碩  
彝武如武武宗義武宗務武宗本武小戊武宗述武碩敏武碩  
愚武如賓武宗魁武如膏武如洒武宗印武如恆武宗文武宗  
三武如鳳武如凱武宗湯武宗桂史瀛士闔永平朱永年孫景  
平薛思禮朱宜年朱宜紅賈德章吳占元張禮芳張金有朱大  
章太學生劉繼室等共三十四人

湯元暘率眾擊賊陣亡同與難者朱增兆朱增標王元燈朱以  
貞周爲寬朱增傑吳宗俊皆不屈死

李有容善火鎗屢斃賊眾寡不敵被賊殺死同與難者李雲漢  
王九安王振社張老漢等四人

光緒睢甯縣志彙

卷十六

人物志

三十三

沙明瑤朱廷芬吳廣濟馬玉林孫九思曹玉善龔東信等七人  
皆在高作社禦賊陣亡又有仲緒陶在瓜蔓社禦賊被害何以  
照李培旨鮑永祥李小孫謝體貴陳芝玉仲照位王學道孟朝  
堂闔文德張振鐸張廣因蔡二劉懷梅王祥功宋履安張犴凡  
十七人皆遇賊不屈被害咸豐八年事也

陳廷榜呂毓鎧王亮功皆武生包永川太學生咸豐八年先後  
禮賊不屈死練勇王統理劉佑培仝伯震姚允秀姚學文李汝  
梁張禮彥袁懷行魏克勝魏景泗張戊戌王振元凌汝同田景  
輝左九張雲科張雲瑞張金闕王化鳳彭振先張玉生王四麟  
童生陳九齡陳步高樊學言滕青吉朱錦舒劉汝安劉汝溪劉

大有劉元慶劉元起謝振清謝振懷謝小鼈徐加元許文清沈萬有吳得泗王得立沙維贊朱士桂鮑得志魏良玉王元忠王元齡李年郝雲敬朱玉蘭朱學曾翁道遠張在現張思純張恩均張學道張學益劉澤奎張清張安朱福凡六十人亦於咸豐八年先後陣亡

周金官豐北營銅汎把總請假在籍咸豐九年四月賊自臺灣回竄金率練在舊城河北岸與賊鏖戰旋以衆寡不敵陣亡同時殉難者議敘九品陳昌齡隨金禦賊力竭被難又有練丁孫泰徐文熙董士昌魏良弼沈步雲湯有成王金王占奇等八人皆同時被害

江蘇忠義局奏  
旌第四十九案

光緒睢甯縣志彙

卷十六 人物志

三十四

姚邦協及其子五典遇賊不屈被害王品三年七十二挺刃殺賊不克被害同時又有郭存清年七十三罵賊被害皆大村社人賈玉林賈賜波蔡江張興文率眾擊賊死路承年官王汎協防罵賊被害尹廷和朱立清皆咸豐九年殉難

孫登山王方朋在凌城社禦賊一被殺一投河死張士宏張士能袁大齡

府志  
作吳

家梅凡四人瓜萁社禦賊被殺胡步前胡學

龍胡善長凡三人池山社禦賊被害從九品王義興高作社禦賊被害又有沙學達王方良許玉保段學開郝丙文倪志東顧科先楊緒哲白廷皆孫瑞祥顧林先顧廷名顧召芝邱光和李敦倫楊自哲劉敦奎王心泗袁三陶四張同選鮑懷忠喻榮歧

王尚玉凡二十四人皆禦賊被害咸豐十年事

王鴻緒邑庠生性方剛咸豐十一年捻匪至脅從村人罵賊不屈被害

李儒賢業醫通曉世務隨徐州都司馮景尼援金陵在浦口戰賊陣亡

王升泰孫士英余得水胡學隆胡步蟾胡彥儒凡六人皆禦賊被害咸豐十一年事

金經權團練衛鄉里同治元年三月初五日皖匪由屏山泗北竄擾城東折回城西距城十里經權率村壯十餘人奮戰陣亡同時遇害者王廷光王景堂康兆銀等三人

光緒睢甯縣志彙

卷十六

人物志

三十五

王廷麟王廷英兄弟也同治元年西匪至率眾與賊戰陣亡同死者有王廷舉王蘊德劉良佐三人

府志作全

振興率練與賊戰陣亡胡瑞英禦賊被害劉修德在浪

子社禦賊被害李德連王榮和周貴崔陳馬開元李朝興李敬業王廷柱顧晏顧六凡十人木社店禦賊被害王義堂王監方單保齡史祥泰史良才史慕義史振泰史來泰朱瑗凡九人高作社禦賊被害薛景齊浪子社禦賊被害劉敦高邱光五辛興社禦賊被害史宜宏張守謨趙玉桂李宗玉瓜蔓社禦賊被害皆同治元年事

沈景宗劉建標楊建常仲統禮朱鳳章全廷扶程爲友胡景文

顧廷洋魏汝芳胡心泰靳保泰陳爾恕葉兆臣葉兆信李培因  
楊小蘆戚小東孫景昌耿文貴嚴學詩曹恆修李天發蔣玉林  
張好山陳玉光王成功湯玉春湯玉藩劉緒達張秀山楊天科  
吳樹盈金明賢李朝芝葉小珠崔學禮王祥泰劉學斌張玉享  
丁鸞音丁開勳陳瑞成鮑德真劉容德凡四十五人皆禦賊先  
後殉難同治元年事

邱光具許長元李小金劉保龍凡四人在辛興社劉家圩禦賊  
被害同治二年事

李象觀李蔭芝萬永清徐開盛徐開明劉紹俊王以涵周振興  
周振剛王懿澤王心助王以佐王根玉葉兆文葉良盡黃有生

光緒睢甯縣志彙

卷十六

人物志

三十六

凡十六人丁家圩禦賊被害同治三年事

李培祉余殿東王學曾唐自北薛小蘆孫二卯鮑小七李培哲  
李敦秀李元亮史宜中李學江蔡登鋒陳士中王經德王宣朋  
吳鳳倫郭九悟李成宜劉和尚劉敦魁王心益凡二十二人皆  
禦賊被害同治四年事

曹恆羣曹懷玉曹懷貝五分社禦賊被害宋禮安張文聖凌城  
社禦賊被害高鳳儀王景奇高作社禦賊被害同治四年事  
邵雲和邵層雲朱秉義凡三人禦賊被害周兆恆欽作霖邵宗  
典李大霖邵合雲邵淮雲邵寶雲邵浦雲邵培貞邵振奇郭髦  
邵玉雲李丙義張監元凡十四人於木社店禦賊陣亡李象乾

李象震李象謙李象恆張永慶崔景奎王小耀周小考王劉住  
張宗玉凡十人於凌城社禦賊被害張冠一楊廷儒沙文定王  
方卓王懿升劉學田凡六人於高作凌城等社禦賊被害同治  
五年事

劉康志劉汝道鄧賢道儀陳社人素習拳勇同治五年四月初  
一日西匪突至居民未及入圩者十之九康志等憤甚遂與劉  
康晏劉汝煥劉宏揚劉宏則田存田劉紹魯朱惟祥朱惟謙共  
十一人奮力禦賊截戰數里賊眾合圍皆被虜死而汝道賢道  
以斲刀段腰死康志以倒懸樹巔抽腸死遇害殘酷聞者傷之  
更有竹城社金學成劉問張守鳳者亦同日與難  
邱慶吉充武毅軍前鋒同治五年從大軍至直隸與賊接戰先  
登陷陳力竭殉難是年又有劉學文徐華年被掠不屈遇害  
鄒瑾練團衛鄉里同治五年四月初一日皖匪竄至率練二百  
餘人擊賊陣斃二十餘人而練丁亦死十人若曹懷璧朱恆盛  
劉廷選褚大有魏曉光史學貴申景福葛延震陳士效皆勇烈  
有可紀者

光緒睢甯縣志彙

卷十六 人物志

三十七

政績

明

湯思恭永樂癸卯舉人歷仕至臨安府知府舊志載其居官公  
廉閭里推服

高瑁正德戊辰科進士授戶部主事督徐州倉考最仕至山東  
提學道僉事居官忠直不避權倖時宦官劉瑾擅作威福其使  
者坐於公案瑁大怒責譴之以此忤瑾遂坐事下刑部瑾敗得  
釋舉朝重之從祀鄉賢

郭深由歲貢任山西州同知居官清介一載辭歸自賦詩云一  
條扁擔兩荆箱向晚南行過太行多少黎民憐我苦清風一路

到家鄉

仝社由歲貢嘉靖時判胡州府正直廉明院道交薦每巡郡邑  
舉以風有位歸之日行李蕭然士民遮道灑泣畱衣履葬之者  
七碑石記其事者三鹿門坤記碑有云潔身如處子守官如力  
家愛民則如慈母乳子祀胡州名宦

仝社舊志  
作仝社悞

周翥由歲貢任臨朐縣丞攝縣篆一載心慈行潔士民愛載及  
歸里大司馬遲鳳翔贈以詩有皇朝寵祿三天永官邸流風百  
世清之句

湯克寬歲貢萬曆十二年任河南衛輝府汲縣縣丞旋以卓異  
除授遼東遼定衛右經歷司清惠有政聲

舊志失采  
特爲補入

光緒睢甯縣志彙

卷十六

人物志

三十八

仝光祖字克華萬曆年拔貢授雲南大理府通判又署蒙化府  
知府才猷卓犖秉性慈祥歷任繁劇俱有政聲

王應乾由進士歷宰太康及棠邑所任風厲有聲仕至大名道  
參議兼河南按察使司副使睢舊有驛站馬皆養之民間以賠  
累破其家者多矣大爲民害應乾白之各憲請改折馬價編入  
正項民甚便之從祀鄉賢著有三教參標四子參標行世并手  
鈔釋道二參標藏於家

劉萬初由功貢任濟甯州知州居官有賢聲時值封疆多故流  
寇沓來萬初攬城固守謂僚佐曰烏合之眾易與耳倘或不虞  
與城俱碎可也相持月餘援至圍解卽解組南歸去後邑人有

甘棠之慕焉

劉宗瀚貢生任五河縣教諭以倫常風化爲己任不數載解組歸田五河士人翕然稱經師焉

劉永懋由貢生考授文華殿中書舍人不媚權璫退歸林下有孝行河陽薛大宗伯所蘊立碑表其墓

國朝

王如皞字照三號熙菴拔貢性和藹嗜詩書考授甯國府教諭以嚴正率多士一洗佻達之風士林重之

朱峻字于天由廩貢生任溧陽旌德定遠臨淮教諭溧陽史文靖以胡瑗爲比及去闔學諸生聚餞者數百人有不獲師承之

光緒睢甯縣志彙

卷十六 人物志

三十九

慨云

卓振清字漪菴號鏡秋乾隆乙酉科拔貢授六安州學正捐陞知縣歷署漢川漢陽興國廣濟等州縣丁艱起復選授廣東翁源縣調署揭陽縣陞羅定直隸州署韶州府未接篆卒振清宰漢川時以經術飾吏治凡勸農桑開溝洫興學校戒爭訟皆力行不倦期年政化大行邑西郊有采芝山形勝關文脈城垣壇宇實依之山主就山陰鑿石歷任皆旋禁旋弛振清乃捐廉付山主使權于母以償其鑿石之利而從此不容鑿石立石記之謂邑以漢川名明乎其地處窪下瀕漢之皋環湖之內古所謂澤國也澤國而何以常存厥賴有境內一二高山維繫奠安之

若采芝山者兀峙西郊城垣壇宇實依其麓尤爲地脈所鍾焉  
辛未秋余承乏茲土甫下車紳士等有諭禁采芝山鑿石之請  
周諮其故知附近居民有陳段鄒三姓者據山之陰爲祖產日  
鑿其石以售人圖一己之利而不顧一邑之害是固亟宜有以  
嚴禁之顧小民何知利之所在雖非其有猶有攘竊况居然爲  
其祖若父畱遺之業乎謂曾歷經前令示禁而終弗能永禁者  
亦固其所於是更有以買之說進者曰公議值若干公捐費若干  
如數以與之諒無不可得也雖然彼非求售而我強之於理既  
有未順彼守世產而我奪之於情亦屬難安且無論三姓不肯  
交易卽交易矣而書契券必有主名夫當年三姓買山之祖安

知今日有鑿石之子孫乎則今日主名買山之人又安保他年  
無鑿石之子孫乎恐越一時而於茲山覬覦復萌訟端又起矣  
此以知公捐之說猶非不易之論不弊之法也余乃集三姓業  
民而詢之曰汝鑿山之石歲入幾何答以不過數千文余又詢  
之曰母錢五十千歲入子錢幾何答以可得數千文余謂之曰  
均是數千文也取諸鑿石勞不如取諸母錢逸矣汝其具契券  
入官領錢五十千文去嗣後茲山之石永爲官物不得鑿鑿則  
皆當作盜論余捐廉買汝石非買汝山也其栽樹采薪卜地營  
葬仍聽汝三姓自便三姓俱欣然諾卽呈券領錢而去邑之士  
民等聞之莫不忭慰僉曰今而後采芝山鑿石之禁始成鐵案

矣余猶恐檔案之久而有失焉因書此事之緣起勒諸貞珉以垂久遠若夫形家之說謂茲山有關於學校風水得培養其扶輿清淑之氣於士風大有裨益余雖未之盡信然晏日類水鬻宮果能鳳起蛟騰爲家之華 國之瑞亦余之厚望也夫石旣勒其弊遂絕咸以卓青天呼之權揭陽時有頑民朱防掌冒明裔倡亂振清出資募勇督戰獲僞軍師劉單眼防掌逃去旋於他處伏誅以功擢羅定牧羅定風俗獷悍士人械鬪釀成巨案賄貧民頂兇輸金入官顛預了事振清廉得其情獲其魁置之法立石永禁有進苞苴關說者嚴絕之民尤感戴振清善詩文工書法 朝考入都與華陽相國卓文端敘爲兄弟相得甚歡

光緒睢甯縣志彙

卷十六

人物志

四十一

道光十年引 見入都文端賦詩贈行以循吏相推振清恐負所知服官數十年口不言錢及歿柩不能歸大吏捐廉助之其廉潔可風矣

朱名璪字錫甫號岩卿生有至性多機警事親以孝聞長就家塾誦書之勤恆徹晝夜應歲試以字譌未售咸豐元年捻逆倡亂目睹心傷慨然有澄清之志援例捐縣丞在籍團練邑之南關東關修築圩牆保全數千人積功保舉知縣効力皖省時曾文正以欽使督辦五省軍務由臨淮赴徐名璪於懷遠差次條陳時務數千言文正極爲獎許調赴徐奏派辦理蒙城圩務勉以實心任事名璪密查情形東南皆苗黨西北皆捻逆兵燹之

餘肆行不法賊來則從賊官來則從官其中傑黠者每勾賊以脅官假官以詐民而取利焉間有一二良民如居黑暗獄中不見天日名噪以爲救民必先除莠而莠民不可勝誅宜先使良民作長庶一圩之邪氣可以漸消然非官爲之主則良民工敢辦也據情上之台省咸善其言檄令得如軍營故事莠民中有曾經保舉者雖三品以下自行酌辦三品以上請示再辦名噪於各圩中訪選醅謹數人立爲正副圩長擇其不法者誅之以報往日之凌虐焉細察密審恩威兼施民心和悅因此上游器之委署蒙城縣知縣縣中凋敝公事繁多署內甚至斷炊幕友憂之名噪笑曰天下豈有餓死之州縣哉飲食從儉而防察胥

吏特嚴修水利整學校建官府修道路辨奇冤而事尤艱大者清丈地畝一節蒙城自張逆三次失陷錢糧地畝徵冊片紙無存捐廉爲紙張費飭圩長地保逐一清丈不一月而冊成兩月開徵蒙民踴躍輸將恆恐居後大憲稱之曰能補渦陽縣調署合肥縣知縣合肥故繁劇號稱難治詰奸禁暴擒巨盜十人正法四境帖然上游將大用之而乃以積勞卒於官中丞吳坤修贈賻銀五百兩治喪有去我膀臂之悲曾文正李相國皆以爲出色人員失此賢令之歎亦可無憾矣

程裕臣大李集人由縣丞升知縣署永定河縣丞所至有政績邑人感其德爲之立祠

文學

明

王之臣廩貢生文學最優科歲試輒冠軍房薦六次不售遂絕意功名以博古爲樂學養並厚後進多賴成就堂姪應乾登進士亦教澤之所及也賦性溫和恂恂退讓晚年更復敬宗收族手錄族譜以示久遠壽八十有二

邱成大爲諸生有文名淮安郡太守詹以名進士衡科試文不分州縣編號糊名彙爲一榜拔成大冠全淮山鹽士論沸騰不屑爲下邑屈詹如前法覆試仍冠軍眾始帖服著有四書詩經邱子約言二部卒以歲貢終其身

光緒睢甯縣志彙

卷十六

人物志

四十二

劉永慶天啟丁卯科舉人邱成大之門人也幼賦奇才爲諸生科歲觀風會考場永慶冠軍者十有五次丁卯應縣科試知縣楊若桐挾刑具入考場永慶白之於庭曰科試朝廷大典非審囚也排列刑具何爲楊叱之曰爾如此狂焉得中永慶曰打手楊以掌拍之果以是科中式戊辰丁父艱丁丑科會試同考黃道周以永慶卷薦元主考與道周有隙不允中元力爭兩不相下抑置副榜永慶曰命也遂就職初任浮山縣知縣升開州知州以文章名於世啟禎天下十八俊永慶其一也

國朝

周世璽順治戊子拔貢中是科副榜爲諸生有文名知縣殷岳

培風會其首推者也試輒冠軍殷常以暮夜步行就晤於深柳堂世璽書舍堂額殷岳手題談文賦詩每至夜分忘形下交其見重如此時教諭許瑤爲常熟名魁每閱其文嘆曰奇才及壬辰登第房牘借刻世璽交者十居其半康熙元年任廣西四會縣知縣風厲有賢能名甫一載餘以疾卒於官

邱園卜順治甲午科舉人辛丑科進士治詩經選壇推爲名家有葩義專橐臈炙人口初任萬全知縣丁父艱補費縣知縣升平遠州知州三任有司皆應聘爲同考官平遠以邊缺考最擢工部管繕司員外遷屯田司郎中康熙庚午科河南副主考仕至湖廣提學道僉事五掌文衡所得皆知名士候補參議回籍

光緒睢甯縣志彙

卷十六 人物志

四十四

家居猶手不釋卷最善汲引後進論文必宗先輩法程尤於書理屏去一切講義惟於大文集注沈思靜悟得之嘗語人以看書之法其生平得力在此

王家選字簡在歲貢生嗜詩書諸子百家靡不窮覽尤長於易大比之年標其寓門曰談易所江南北老師宿儒多以易相質所作詩文爭爲傳誦幾於紙貴文望與本邑邱兆吉相頡頏周裔繩字育萬貢生天資英敏幼讀父書卽能領會大義弱冠蜚聲鬻庠爲邑名士不數載貢入成均應南北闈鄉試凡六次兩薦不售以先世濂溪夫子手著太極圖說平日加意體會頗得其奧知縣王廷梅聞而慕之親拜於庭相與講論深自佩服

題其間曰濂溪映秀督學使者林給匾曰經明行修

梁士優歲貢生勤學寒暑不輟歲試學使閱文異之拔冠八屬  
貢入成均而困於有司終年默守硯田其家名列黌宮先後已  
八世矣

王錫田字魯東號蘅浦乾隆丁酉科選拔舉孝廉方正南北鄉  
試屢薦不售嗣以母老家居知縣陳朝汲延主桂林書院講席  
博覽羣書爲文一準理法著有四書集腋四書類典窮源慵儂  
詩藁古近體尤工麗自著隨緣子傳極纏綿悱惻之情謂隨緣  
子者風雅有志士也半生坎坷久而自悟因自號隨緣子夫緣  
之突起正不知胡自來矣憶童穉時識解猶未開也而每遇風

光緒睢甯縣志藁

卷十六

人物志

四十五

月良宵鶯花勝地輒悵望若不勝情是豈非夙世之慧根鍾成  
今生之魔障歟束髮後刻苦習誦而累困於功名之途若呼盧  
然成伴者數矣旋而爲么若弋禽然麗龜者數矣挺而復走居  
恆取所爲文章及五七言雜體對酒長吟未嘗不掀髯自喜亦  
復擁鼻以泣夫笑泣無端大抵皆孽緣耳至於莊子鼓盆之嗟  
潘岳悼亡之賦數十年來嘗之屢矣若乃夕陽西下碧雲在天  
撫松桂於庭間悄無人而延伫又或夢殘斗帳酒渴霜晨落葉  
打於窗牖斜月耿於簾旌枕上星髮初添衾中雞骨增瘦顧此  
茫茫百端交集兼之計拙迎合鬼善擲揄縱甘牛馬之呼依然  
抑鬱誰語豈不痛哉繼自今身世亦可爽然失矣其將爲鳴鳳

之在霄可也爲泥龜之曳尾可也爲沙蟲之蠕動亦可也不然而骨燼形銷賸此抑鬱之氣化爲風之清月之朗照千里以生輝吹萬卉而齊發以是爲快意之秋可也又不然而或爲驚雷爲走電爲峭石之插空爲怒濤之拍岸鬱勃閃爍崛律洶湧以是寫不平之鳴可也緣之隨也如是夫抑又有感者向嘗於攝山寺口坐聽清梵維時江聲遙和漁鼓杉月涼沁心脾飄飄然有出塵之想每擬畫爲座圖置身其上時澆一杯呼而共語佛乎仙乎萬緣俱空又何隨緣之足云讀者輒以爲哀豔動人而生平鬱鬱不得意亦於此見之矣後百年桂林侯紹瀛來宰睢甯爲刊遺詩一卷竝表其墓曰詩人王魯東先生墓

光緒睢甯縣志彙

卷十六

人物志

四十六

王伊淳廩生天性孝友嗜古能文讀書千言過輒成誦以弱齡補弟子員列優等涉獵經史及秦漢唐宋諸大家故其爲文悉有恨祇惜乎屢困名場而不顯達風規嚴峻言笑不苟凜然不可犯弟伊濱伊泗伊湛俱食餼乃淳之教也

朱嗣宗候選教諭天資穎異幼歲能文獎掖後進多所成就魏廣業字函一少讀書講理學秋試疊薦不售母薛年高奉養無少懈嗣薛壽九十七終哀毀逾制遠近以孝聞平居以讀書養性爲事手輯養心編二卷首卷皆古今忠孝義理深厚之文次卷多名流詩歌終日披吟不輟年八十四無疾而終其子晟字仲季幼聰穎讀書過目不忘嘗從諸名士游而困於場屋鬱

鬱不得意生平爲文能日成十數藝皆卓卓可傳歷任學使多奇之卒年六十六歲著有謙山詩文賦鈔四卷

袁錫軒字景南號瑤溪貢生候選教諭嗜古能文尤長於詩骨力超卓有唐人遺風著有瑤溪詩話狐腋集心鏡錄朱子家訓註等書一時四方多士負笈來遊成就甚夥

郭培元字象乾號前山道光丁酉科舉人情性和易大挑教諭以親老未就家居讀書著有前山文彙

魏桐封字榮墅號鹿町品誼高卓學業淹雅早歲游庠聯舉有司不第設帳授徒多知名士著有四書揭要易經舉似鹿町詩鈔西匪竄擾廬舍毀於火彙亦爲灰燼惜哉

光緒睢甯縣志彙

卷十六

人物志

四十七

褚畚經邑諸生賦姿穎異於書無所不讀尤邃於經學周系英學使考試徐屬經古以小戎棧收全章命題風檐寸晷中一揮而就瞭如指掌周學使亟嘉賞之批云江左不乏通經之士然未有若此生之源原本本者著有經解啟蒙未梓而燬於兵王雅南字以同增廣生早歲聞名兼有著述年未弱冠卽補弟子員著有性理字說一函開蒙俗說四書字義四函於講義尤精博凡所藏之經史子集無不丹黃解釋古近體尤雅飭書工眞草醫理亦多發明疎解

周尚志字孟懷邑庠生賦性聰穎善屬文甫弱冠卽列膠庠生平博學好古所著經史子集各數百卷篝燈夜讀嘗坐以待旦

故其發爲文章形於詩歌駸駸乎逼古人之境幾欲步其轍而摩其壘矣

侯得璧字昆圃恩貢生聰穎嗜詩書以府試冠軍補弟子員旋食餼焉課讀三十餘年足不履城市循循善誘成就人才甚多趙逢吉歲貢生和平好學弱齡補弟子員食餼上庠屢薦未售居家教授手不釋卷

朱名俊性嗜酒不修邊幅有書癖好諸子百家之書夙所熟識學者聆其緒餘勝於十年讀書允稱博洽

卓金生字品三廩生性磊落小試出輒冠其曹歲科屢列高等老師宿儒咸期其遠到享年不永士林惜之

光緒睢甯縣志彙

卷十六

人物志

四十八

隱逸

明

王應中崇禎癸酉經魁革代後隱居不仕閉戶讀書以自娛居於城絕趾公庭有司以此益重之鄉同年大學士呂宮作招隱書勸之仕應中辭以無吏治才不就與鄉人接和易可親不立崖岸蓋亦有玩世之意焉

流寓

明

任國鑛字玉符蕭縣人六歲喪母哀毀如成人事繼母以孝聞明季寇亂妻戴氏死之國鑛奉父避居睢境

王載鴻靈璧諸生嘗寓睢甯西鄉崇禎甲申之變著青衫北面叩頭撫劒而死著有刈落遺稟燬於兵

國朝

崔干城號兔牀河南甯陵人初與睢李枝翹相友善因家焉工書法尤長於詩古文詞博學強記叩以典故無不解者合肥龔端毅推為文章宗匠恨相識之晚客都門一時學士大夫皆稱兔牀先生而不名寓睢三十餘年卒葬於此著有文彙二十餘

卷末梓

按兔牀或稱明進士鼎革後寓於壽麓山李氏條侯之商芝館其子桐亦在焉不忘勝國有志興復及見興朝治隆唐虞有不以妄動者遂隱而不出其生平於天文地理兵法劒術醫卜神仙之事無不究心得其秘要誠異人也殆王五

光緒睢甯縣志彙

卷十六 人物志

四十九

公傳青主  
之流亞歟

李之實延慶州歲貢生順治五年任睢訓導十年九月殉膠寇難後人力田於東南鄉即今李學官莊也裔孫玉堂同治甲子

科副榜

邑人王錫田李氏譜序李氏發源句曲通籍燕臺始則定吉卜於媯川繼則揚仁聲於范令書藏金薤毓累葉之女人星化玉衡種蟠根之仙李迄乎之實先生窮經石閣秉鐸臨淮攬桃李之芳春標蘇胡之雅韻乃豕突忽逢膠寇而蟻穿竟鮮堅城刁斗屯雲白馬青絲之織鋒煙市地黃塵碧血之悲先生則罵賊登陣蹈鋒殉義野戍之霜鈴雨柝烟斷兵闌覺宮之雅馨風絃化刃氣愛荷龍章三錫特頒御祭一壇時則我先生侍從薄宦署冷鄭虔遭際戎氛心傷庾亮三年哭於旅館十口寄於天涯鄉關則雲樹蒼茫客邸則囊囊索瑟因緣畱滯即次遷延遂稱土著於蘭陵載詠瓜綿於睢水雉零雨桑田之暇玳瑁裝書滿函冰雪之文珊瑚作架此則

無逸詩集所以畱傳也夫以李氏之家傳忠孝代毓賢良允矣于公之戶特高畢萬之宗必大名登柱史他年披鳳臺鸞閣之文編系著家乘此日覽木本水源之籍僕以獼祭竟辱蟲鑿謹述窺管之情用作鋟梨之引云爾

孫大培宿遷人道光年間從母王氏徙居瓜萁社大培性頗慧因家貧不能讀書遂習鍼工以養母一日母病思食肉培利剝肱烹進疾竟愈繼病而歿躄踊慟絕逾時復甦戚里再三勸喻始經營謀葬後廬墓每日茶飯祭死如生三年禮畢撒廬家居逢節祭掃親往無間必慟哭如孺慕焉

### 方伎

國朝

孫宗岳精醫能以意治病厄應手輒效乾隆二十三年靈璧知

光緒睢甯縣志彙

卷十六

人物志

五十

縣貢震抱病羣醫束手或以宗岳薦診之笑曰此肉積也一藥而愈贈金不受某太守幼子病劇延宗岳治之以手摸曰無病思玩物耳詰乳媪果有銀鈴失去數月尋給玩之三日病若失人以爲孫一摸稱之晚歲名震江淮有孫氏醫案今不存

朱允涵字養素性豪爽家素貧而精於醫沈疴痼疾應手而愈其丹方流傳依證試之立效一日有老媪攜子婦以腹內孩哭求治朱方視葉子戲不應媪哀之再朱怒撒葉子滿地令婦鞠躬拾之朱笑曰愈矣已而果然蓋兒在腹中含血帶勤勞震動兒失之故哭今曲躬兒得血帶故不哭也妙有理解而不知出自何書乾嘉年間事

朱明道精易理曉奇門之術能知未來事有自注周易一卷存  
家朱振玉亦通卜筮星學屢有奇驗

宋廷選儒醫也少應童子試不利遂專治岐黃著手無不驗時  
人目爲緩扁

李長善精拳技習內工鄉里健兒欲與角力長善曰何苦以命  
爲兒戲耶皆不之信長善解衣盤礴以醫坐廡下巨礎上及起  
礎立碎羣驚以爲神咸羅拜之